

Landesbibliothek Oldenburg

Digitalisierung von Drucken

**Bibliotheca Smithiana, Seu Catalogus Librorum D. Josephi
Smithii Angli Per Cognomina Authorum Dispositus**

Pasquali, Giovanni Battista

Venetiis, 1755

Leonardus Arentinus

urn:nbn:de:gbv:45:1-844

LEONARDUS ARETINUS [1]

de Bello Italico adversus Gothos. [2]

Venetiis MCCCCLXXI. [3] per Nicolaum Jenfon.

ETSI longe jucundius mihi fuisset Italiae felicitatem, quam clades referre; tamen quia tempora sic tulerunt, sequemur & nos fortunae mutabilitatem, Gothorumque invasionem, & bellum, quo Italia tota pene everfa fuit, in his libris describemus. Dolorosam profecto materiam, sed pro cognitione illorum temporum necessariam. Neque enim Xenophonem Atheniensem summo ingenio virum, cum obsidionem & famem ac diruta moenia Athenarum descripsit, non dolenter id fecisse reor; scripsit tamen, quia utile putabat illarum rerum memoriam non deperire. Neque Livius noster cum urbem Romam a Gallis captam, & incendiis conflagram tam refert, minorem meretur laudem, quam cum P. Aemilii triumphum illum praclarum de Macedonibus, aut P. Africani victorias enarrat. Historiae quippe est tam prosperas, quam adversas res monumentis litterarum mandare. Itaque optanda quidem meliora sunt; scribenda vero quaecumque contigerint. Me certe haec ipsa scribentem quanquam multa pro singulari amore meo erga Patriam conturbant; tamen illa ratio consolatur, quod etsi res tunc maxime adversas Italia perpessa fuit, ad extremum tamen superatrix externarum gentium nostram ad usque aetatem terra marique potentissima remansit; civitatesque in ea ornatissimae magnis opibus magna- que auctoritate viguerunt hactenus, hodieque vigent, quarum gloria & imperium longe lateque extenditur, ut non tam ingemiscendum sit pro his quae tunc acciderunt, quam laetandum. Ceu Herculem magni labores celebratiorem fecere, quam si nunquam tam periculose laborasset. Taceo morum elegantiam, humanitatemque praecipuam, ac bonarum artium disciplinas, in quibus parens simul & alumna incomparabilis Italia reperitur. Sed commendationis aliud fuerit tempus. Hujus autem belli, quod nunc scripturi sumus, nulla apud Latinos notitia supererat; fama tantummodo quaedam & ea ipsa tenuis admodum & obscura ferebatur. Belisarium & Narsetem Justiniani Duces Gotthos Italia pepulisse, ubi vero, vel quomodo, vel quibus rebus gestis nihil penitus sciebatur. Nobis autem ex Graecorum commentariis earum rerum notitia fuit. Itaque ut alia satis multa, sic etiam haec jam plane oblitterata ad cognitionem nostrorum hominum reducere studuimus. Atque eo libentius fecimus, quod caeterae quidem historiae de alienis rebus fere existunt; haec autem tota de nostris est. In qua operae pretium fuerit, quae tunc per Italiam Urbes, qui populi, quae conditio rerum esset, cognoscere; quae obsessae urbes, quae expugnatae, ac victae, & quibus

n 2 in

[1] Hic ortus est ex gente Bruna Aretii. A Secretis Literarum Apostolicarum fuit sub Innocentio Septimo, Alexandro Quinto, & Joanne Vigesimo secundo; demum Republicae Florentinae Scriba constitutus, a qua ob plurima ejus merita, Florentina civitate donatus non modo, sed etiam diuinitatibus ornatus fuit.

[2] Jacobus Tomafius de Plag. Liter. num. 361. pag. 159. inter plagiarios Leonardum enumerat propter hanc Gothorum Historiam, ut

pote ex Procopio translata. Cl. autem Vir Apostolus Zenus in T. ix. Diar. Litter. Italiae, pag. 208. illum tuetur; nam ut ipse contendit, non solum ex Procopii, verum etiam ex aliorum dictis Historiam hanc consarcinavit.

[3] Prima Editio commemoratur a Maittaire in Annal. Typ. T. I. Par. I. pag. 290. ad ann. MCCCCLXX. per Emilianum de Orfinis Fulginatem, & Johannem Numisifer Theutonicum, eorumque Socios.

